



Broj: 05/1-50-15-26-19-5/22

Sarajevo, 12. 12. 2022.

## IZVJEŠTAJ

### **sa sastanka članova Nezavisnog odbora Parlamentarne skupštine BiH kao nezavisnog tijela policijske strukture BiH s rukovodstvom Direkcije za koordinaciju policijskih tijela BiH**

Sastanak je održan 14. 11. 2022, s početkom u 13 sati, u prostorijama Direkcije za koordinaciju policijskih tijela BiH u Sarajevu. Prisustvovali su: Mirsad Vilić, direktor Direkcije za koordinaciju policijskih tijela BiH, i Ranko Vuković, zamjenik direktora Direkcije za koordinaciju policijskih tijela BiH, Uroš Pena, drugi zamjenik predsjednika Nezavisnog odbora, Nikola Džambas i Muhamed Mujakić, članovi Nezavisnog odbora, te Ivana Lovrić, sekretarka Nezavisnog odbora.

Direktor Direkcije za koordinaciju policijskih tijela BiH Mirsad Vilić poželio je dobrodošlicu članovima Nezavisnog odbora i rekao da je na raspolaganju za sva eventualna pitanja.

Uroš Pena, drugi zamjenik predsjednika Nezavisnog odbora, ukratko je obrazložio razlog posjete. Rekao je da je posjeta organizirana u skladu s dogovorom s posljednje sjednice Nezavisnog odbora, ali i u skladu s Planom i programom rada Nezavisnog odbora za 2022. godinu, a s ciljem održavanja kontinuiteta saradnje s policijskim agencijama iz svoje nadležnosti.

Direktor Direkcije za koordinaciju policijskih tijela BiH (u daljnjem tekstu: Direkcija) upoznao je članove Nezavisnog odbora o značajnim aktivnostima koje su imali u proteklom periodu kao i problemima s kojima se susreću u radu. Istaknuo je da je misija i vizija ove policijske agencije jačanje komunikacije s drugim tijelima u Bosni i Hercegovini.

Kada je riječ o Pravilniku o unutrašnjoj organizaciji i sistematizaciji radnih mjesta u Direkciji za koordinaciju policijskih tijela BiH, direktor je istaknuo da je on upućen prema Vijeću ministara BiH, ali da nije dobio saglasnost. Razlog za to je što nije dobio pozitivno mišljenje Ministarstva finansija i trezora BiH, ali i zbog problema sa saradnjom s EUROPOL-om. Naime, Pravilnikom o unutrašnjoj organizaciji i sistematizaciji radnih mjesta u Direkciji, u sklopu Sektora za međunarodnu policijsku saradnju, propisan je Odsjek za saradnju s

EUROPOL-om, čije je sjedište u Direkciji za koordinaciju policijskih tijela BiH, a ugovorom o saradnji između BiH i EUROPOL-a propisano je da je kontakt-tačka s EUROPOL-om u prostorijama Ministarstva sigurnosti BiH. Da bi saradnja počela, neophodno je u isto vrijeme mijenjati Zakon o ministarstvima i drugim organima uprave BiH, Zakon o Direkciji za koordinaciju policijskih tijela BiH, pravilnike o unutrašnjoj organizaciji i sistematizaciji radnih mjesta i Ministarstva sigurnosti BiH i Direkcije.

Dalje u razgovoru s članovima Nezavisnog odbora direktor je istaknuo da Direkcija trenutno štiti 136 objekata na čitavoj teritoriji BiH, što je regulirano Odlukom Vijeća ministara BiH o određivanju osoba, objekata i vrijednosnih pošiljki koji se štite. Naglasio je i da je u završnoj fazi izrada nove Odluke o određivanju osoba, objekata i vrijednosnih pošiljki koji se štite, a koja će po završetku biti upućena Ministarstvu sigurnosti BiH odnosno Vijeću ministara BiH. Također, naglasio je da je u proceduri donošenje novog Zakona o policijskim službenicima BiH kojim se, između ostalog, predviđa eksterni premještaj policijskih službenika na nivou BiH. Takva izmjena bila bi od velikog značaja za sve tri policijske agencije u BiH.

Naglasio je da u ovom trenutku nedostaje veliki broj policijskih službenika. Trenutno je na školovanju u Mostaru 50 kadeta pa bi se njihovim dolaskom donekle smanjio broj nedostatka policijskih službenika.

U razgovoru s članovima Nezavisnog odbora direktor je istaknuo da ima izuzetno dobru saradnju s drugim policijskim agencijama u BiH. Poseban akcenat je na saradnji s Graničnom policijom BiH kojoj pružaju konstantnu podršku u obavljanju poslova granične kontrole.

Na upit članova Nezavisnog odbora da li se riješio problem trajnog smještaja Direkcije, direktor je istakao da su bili u pregovorima s Vladom Kantona Sarajevo o etažiranju dijela prostorija JU „Studentski centar“ koje sada koriste a za koje plaćaju zakup, ali je trenutno sve na čekanju.

Na kraju su članovi Nezavisnog odbora naglasili da će i dalje, u okviru svojih nadležnosti, pružati podršku radu Direkcije za koordinaciju policijskih tijela BiH i poželjeli im mnogo uspjeha.

Sastanak je završen u 14.10 sati.

**PREDSJEDNIK**  
**NEZAVISNOG ODBORA**  
Enes Obralića